



*Jumat, 14 Oktober 2022*  
**Ogen: Masmur 19:2**



TINEPA ERBERITA



**A**di misalna sinasa si lit bas doni enda banci ngerana, menurutta kai nge ndia ibelaskenna? Lit nge kari kata pemuji-mujina man banta sabap nggo silakoken si mehuli man bana? Entah kin banci jadi perik-perik sikabang e pe nggo ngelabuh ia banta sabap lanai bebas ia kabang sabap polusi udara seh kelekna. Uga ka nina nurung-nurung man banta? Rumahna si apai pe lau belin, paya-paya, lawit si mbelang dum alu sampah. Adi sungkun Tuhan kari man kayu-kayu kerangen, man deleng-deleng kerna dahinta mpekena-kena doni enda, uga nge nina tinepa e erberita?

Bas rumah makan padang megati lit suratkena "Bila anda puas beri tahu pada yang lain, bila anda tidak puas beritahu kepada kami". Em gegeh pemberitan. Emaka berita si mehuli nge si man usahanta jadi kerna dirinta. Kita nggeluh bas doni enda, la manusia ngenca. Lit tinepa sideban i sekelewetta, amin gia ia la erkuan ras kita alu bahasa manusia, tapi situhuna ia pe mahluk si nggeluh. Kita ngaloken manfaat i bas dirina nari. Tinepa sideban e jadi sumber panganta, sumber pencarinta, penopang geluhta ras sada nari peranna si cukup penting bas geluhta, ia me si man pekena-kenanta, jadi bukti pengabdianta man Tuhan si mada tinepa. I bas HUT MORIA sekali enda pusuhta igugah pe-Masmur, kai ngenda si bahan maka tuhu-tuhu *langit encidahken kemulian Dibata, awang-awang erberita*. Adi i bas zaman pe-Masmur kerina tuhu-tuhu mehuli denga. Musim ergancih bas paksana, udan ras lego ertentun paksana. Tapi genduari kerina nggo ceda. Mari dage si persada sura-suranta, jadilah kita teman man tinepa enda. Si imani ras si aminken Moria sahabat alam. Bas dampar geluhta sitep-tep wari si ban sekelewetta enda bagi dirita indah, rapi dan bersih. Emaka erberita ia man Dibata, nggo dahiken Moria dahinna, mpekena-kena doni enda.